

DODATAK

GRAČANIČKI GLASNIK
*časopis za kulturnu historiju*Broj 57
Godina XXIX
Maj, 2024.
[str. 295-297]

© Monos 2024

DODATAK

Glosar novih autora

Admir Čavalić, magistar ekonomskih nauka, rođen je u Tuzli 1987. godine gdje je završio osnovnu i srednju školu, a potom i Ekonomski fakultet Univerziteta u Tuzli. Na istom fakultetu je dva puta magistrirao (2013. i 2017.) i tako stekao zvanje magistra ekonomskih nauka. Treći ciklus studija upisao je 2017. godine koje već privodi kraju. Njegova doktorska disertacija pod naslovom "Uticaj strateških partnerstava između preduzeća i organizacija civilnog društva na poslovne performanse preduzeća" nalazi se u kod komisije u proceduri ocjene, nakon čega slijedi odbrana. Tokom svojih postdiplomskih studija radio je 7 godina kao asistent na katedri Menadžment i upravljanje na Ekonomskom fakultetu Univerziteta u Tuzli. Nakon toga prelazi na Internacionalnu poslovno-informacionu akademiju (IPI) Tuzla gdje radi kao predavač. Autor je prvog bosanskohercegovačkog dokumentarnog filma o ekonomiji i osnivač je Udruženja "Multi" koje je pionirsko domaće udruženje za promociju ideja ekonomskog liberalizma. Obavljao je dužnost direktora Agencije za privatizaciju Tuzlanskog kantona, te je bio gradski vijećnik u Tuzli. Od 2022. godine je zastupnik u Zastupničkom domu Parlamenta FBiH, gdje vodi Odbor za ekonomsku i finansijsku politiku. (Ko)autor je više knjiga, na desetine naučnih i stručnih radova, te brojnih analiza i studija, uglavnom iz oblasti ekonomske politike. Redovno se pojavljuje u domaćim i regionalnim medijima iznoseći svoje poglede na aktuelne trendove u oblasti tržišta i ekonomije. Član je organizacijskog odbora ICEI i DIEC naučnih konferencija i član savjetodavnog odbora Journal of Liberty and International Affairs. Isto tako, član je Vijeća Kongresa bošnjačkih intelektualaca, te je fellow John McCain for Freedom, Atlas MBA, Britanske ambasade, i alumna mreže Švicarske ambasade. Od njegovog neformalnog obrazovanja izdvaja se LAAD program pod mentorstvom Francisa Fukuyame (Sarajevo, Bosna i Hercegovina), Napredni seminar o ekonomskom razvoju pod mentorstvom profesora Keith Jakee (Kartagena, Kolumbija), Atlas Leadership Academy pod mentorstvom Tom G. Palmer (Fairfax, SAD) i CPR istraživačka škola (Koči, Indija).

Enes Durmišević, doktor historijskih nauka, redovni profesor univerziteta, rođen je 1955. godine u Sanskom Mostu, gdje je završio osnovnu školu, a potom Gazi Husrev-begovu medresu u Sarajevu (1974). Pravni fakultet u Sarajevu završio je 1980., a Filozofski (orijentalni jezici), 1989. go-

dine. Magistrirao je 2000., a doktorirao 2003. takođe na Pravnom fakultetu u Sarajevu. Nakon završetka fakulteta, prvo je kratko radio kao prevodilac za arapski jezik u Libiji, a zatim kao profesor i sekretar u Gazi Husrev-begovoj medresi (1983 – 1990). Od 1990. do 2092. radi na poslovima sekretar časopisa “Glasniku Rijaseta Islamske zajednice u SFRJ”. Od 1992. do 1994. radio kao novinar urednik u sedmičnom listu “Ljiljan”, a od 1994. do 1997. i kao urednik istoimene izdavačke kuće. Svoju akademsku karijeru započeo je 1997. godine, nakon prima za asistenta na predmetu “Historija države i prava BiH” na Pravnom fakultetu u Sarajevu. Kroz dugogodišnji rad u nastavi, biran je u sva akademska zvanja– od docenta do izbora u zvanju redovnog profesora, 2015. i penzionisanja 2022. godine – uglavnom na istom predmetu. Izveo je generacije studenata, mnogima bio mentor ili član komisije za odbranu doktorata, magistarskih i diplomskih radova. Uporedo sa pedagoškim i naučnim radom, bavio se i publicistikom, bio član redakcije nekoliko stručnih časopisa i publikacija. Uredio je preko stotinu knjiga, monografija i udžbenika iz oblasti historije, islamistike, historiografije, književnosti, publicistike itd. Autor je pet knjiga/monografija i dva udžbenika, oko 80 naučnih i stručnih radova, 12 prikaza, učesnik 60 međunarodnih i domaćih naučnih skupova i konferencija. Ističemo naslove svih pet objavljenih knjiga: *Uspostava i pravni položaj Rijaseta Islamske zajednice u Bosni i Hercegovini 1882-1899. godine* (Sarajevo, 2002., str. 203); *Šerijatsko pravo i nauka šerijatskog prava u Bosni i Hercegovini u prvoj polovini 20. stoljeća*, (Sarajevo, 2008., str. 289); *100 godina Udruženja Ilmijje – monografija*, Sarajevo, 2012. (u katorstvu sa prof. dr Ismetom Bušatlićem i prof. dr. Enesom Karićem); *Uvod u razvoj pravne misli u Bosni i Hercegovini*, (Sarajevo, 2014., str. 158); *Bosna i Bošnjaci: od*

istočnog pitanja do genocida, (Sarajevo, 2023., str. 662.)

Amir Džinić, magistar historijskih nauka, rođen je 1985. godine u Zenici. Osnovno obrazovanje i Pedagošku gimnaziju završava 2004. godine u rodnim Zavidovićima. Završio je Filozofski fakultet Univerziteta u Sarajevu na studijskoj grupi Historija i Turski jezik i književnost, Program ljetne škole iz oblasti historije, jezika i književnosti završava iste godine u Ankari na *TOBB Ekonomi ve Teknoloji* Univerzitetu. Magistrirao je 2015. godine na Filozofskom fakultetu Univerziteta u Sarajevu na Odsjeku za historiju (oblast novi vijek). Posjeduje certifikate o završenom prvom i drugom stepenu specijalizacijskog kursa za čitanje osmanskih dokumenata na Univerzitetu u Sarajevu – Orijentalni institut, kao i treći stepen Osmanskog jezika u institutu Yunus Emre. Radni odnos je započeo je nakon završetka osnovnog studija u Turskom vojnom predstavništvu u Sarajevu kao prevodilac, gdje ostaje do početka 2022. godine kada stupa u radni odnos na Institutu za historiju Univerziteta u Sarajevu na mjesto višeg stručnog saradnika za osmanski period. Objavio je nekoliko prikaza u različitim časopisima i izvorne naučne radove pod naslovima: “*O društveno-političkim prilikama u Smederevskom sandžaku i Bosanskom ejaletu krajem 18. i prvim decenijama 19. stoljeća*”, Prilozi Instituta za historiju UNSA br. 51; “*Mehmed Salih Vedžihi-paša prema osmanskim dokumentima*”, Anali Gazi Husrev-begove biblioteke, Svezak 30 Br. 44, Knjiga XLIV; “*Prilog poznavanju prilika u Bosanskom ejaletu za vrijeme Mahmuda Hamdi-paše i Davud-paše (1832–1835) prema osmanskim dokumentima*”, Historijska traganja br. 22. Uzeo je učešće na konferenciji “*Islamska kultura i tradicija u Orašju od sredine 19. stoljeća do danas*” (2022.) sa temom “*O nekim formama folklora kod muslimana u Bosanskoj Posavini (1862-1914)*”. Bio je

učesnik međunarodne konferencije o Romima u Sarajevu (2024.) sa referatom "O izdatim bujrukdijama Romima početkom 19. stoljeća", kao i učesnik internacionalne konferencije u Skoplju u okviru projekta "Islamska misao prema periodici na Balkanu 1918-1945", na kojoj je održao izlaganje na turskom i bosanskom jeziku pod nazivom "O političko-vojnim prilikama i islamskim pitanjima u Republici Turskoj prema bosansko-hercegovačkom časopisu *Islamski svijet (1832-1836)*". (2024.)

Ajdin Huseinspahić, doktor pravnih nauka, univerz. profesor, je rođen 1984. godine u Zenici. Osnovnu i srednju školu završava u rodnom gradu, nakon čega, akademske 2003./2004. godine, upisuje Pravni fakultet Univerziteta u Sarajevu. Dobitnik je posebnog priznanja dekana Pravnog fakulteta Univerziteta u Sarajevu za postignut odličan uspjeh tokom studija. Naposredno nakon dodiplomskog studija upisuje postdiplomski studiji na Pravnom fakultetu Univerziteta u Zenici, gdje je na Katedri za historiju države i prava odbranio i magistarski rad. Doktorski rad je odbranio u decembru 2015. godine na Pravnom fakultetu Univerziteta "Džemal Bijedić" u Mostaru. Zaposlen je na Pravnom fakultetu Univerziteta u Zenici, gdje je stekao akademsko zvanje vanrednog profesora, šef je Katedre za historiju države i prava. Kroz decenijski rad u svojstvu nastavnika ili saradnika, na Pravnom fakultetu u Zenici, angažovan je na predmetima Historija države i prava Bosne i Hercegovine, Rimsko pravo i Komparativna pravna historija. Sedam godina je obavljao poslove izvršnog urednika časopisa *Anali Pravnog fakulteta Univerziteta u Zenici* (2011.-2018.), da bi od 2018. godine postao član uređivačkog odbora časopisa. Do sada je objavio preko trideset naučnih i stručnih radova, kao i znatan broj tekstova u IIN "Preporod", sedmičniku "Stav" i na broj-

nim drugim medijskim platformama. Učesnik je i mnogobrojnih domaćih i međunarodnih konferencija, simpozija, tribina, okruglih stolova, kao i član mnogobrojnih organizacionih odbora. Nosilac je značajnih projekata na nivou lokalne zajednice. Predsjednik je Bošnjačke zajednice kulture "Preporod", gradsko društvo Zenica i član Vijeća Kongresa bošnjačkih intelektualaca. Promotor je i značajnog broja publikacija. Autor je knjige "Od berlinske do dejtonske Bosne i Hercegovine - pravno-politički status Bošnjaka", kao i TV serijala "Od Kulina bana do današnjih dana".

Smiljana Mamuzić, rođ. Petrović, defektolog, magistar logopedije, rođena je 1953. u radničkoj porodici u Gračanici, gdje je završila osnovnu školu i gimnaziju. Diplomirala je 1976. na fakultetu za defektologiju u Zagrebu, stekla zvanje magistar logopedije i profesor za slušno oštećene osobe – surdopedagog. Bila je odličan učenik od prvog osnovne i tokom cijele gimnazije koju je završila najbolji đak generacije, a na Fakultet defektologije u Zagrebu drugi student po uspjehu. Za postignute rezultate tokom školovanja dobila je niz učeničkih i studentskih priznanja. Nakon završenog fakulteta, radila je kao profesor slušno oštećene djece u Sarajevu, sve do početka rata, aprila 1992. godine, kada sa djecom odlazi u izbjeglištvo, prvo u Zagreb, a nakon dvije godine u Kanadu. Kao izbjeglica uspjela je evaluirati svoju diplomu na Faculty of Education University of Toronto i dobiti kanadsku licencu profesora osnovne i srednje škole. Radila je u kanadskoj školi u Windsor-u, Ontario sve do penzionisanja, 2019. godine. Piše, uglavnom "za svoju dušu". Emotivno je vezana za Gračanicu i prvi put objavljuje u ovom časopisu. Sada živi na relaciji Toronto - Gračanica. Jer Bosnu, Gračanicu, Sarajevo i svoje prijatelje nikada nije napustila.